

四庫全書

史部

欽定四庫全書

史部  
元史卷一至四

御史<sub>臣</sub>徐如澍覆勘

總校官編修<sub>臣</sub>朱鈴

御製改譯遼金元三史序

改譯遼金元三史成司事者以序請史無序例也  
齊梁陳書及後五代乃有序蓋出於宋臣修史者  
初為之飾例也亦足以觀其政之不綱而事之紛  
紊也若今三史之請序將比於孰乎曰彼之序皆  
序其事而此之序乃序其言則不可以齊梁等比  
之矣序其言亦非為之修辭飾說乃改譯漢文譯  
其國語之訛誤者至於其國制度之理亂君臣之

得失未嘗一字易蓋史者信也所以傳萬世垂法  
戒彼其時之史或已不能保其必信數百年之後  
無庸為之修飾且改譯者不過正其訛誤之語而  
其舊史之布天下者自在也讀史者執舊簡而証  
以新書則可知語之異而事之同則此序之不可  
不作乃所以明吾志也夫春秋一字之褒貶示聖  
人大公至正之心若遼金元三國之譯漢文則出  
于秦越人視肥瘠者之手性情各別語言不通而

又有謬寓嗤斥之意存焉此豈春秋一字褒貶之  
為哉向于改譯三史之旨及同文韻統熱河志諸  
序已屢言之茲不復綴夫遼金雖稱帝究屬偏安  
元雖一統而主中華者纔八十年其時漢人之為  
臣僕者心意終未浹洽我國家承

天庥命建極垂統至於今百四十年矣漢人為臣僕者  
自其高曾逮將五世性情無所不通語言無所不  
曉且今之纂修諸臣即有善通清書兼習諸國字

全宋文卷之八  
之人則茲三史必當及此時而改譯其訛誤者是  
則吾于遼金元三代實厚有造而慰焉雖然造  
非吾造乃

天造我國家重熙累洽而後得此則所以祈

天永命日慎一日之忱惟益兢兢懼乃勝于慰焉云耳

欽定四庫全書

元史

提要

臣等謹按元史二百一十卷明宋濂等奉勅撰洪武二年詔修元史以濂及王禕為總裁二月開局天寧寺八月書成而順帝一朝史猶未備乃命儒士歐陽佑等往北平採其遺事明年二月詔重開史局閱六月書成為紀

四十七卷志五十三卷表六卷列傳一百十  
四卷書始頒行紛紛然已多竊議迨後來遞  
相考証紕漏彌彰顧炎武日知錄摘其趙孟  
頌諸傳備書上世贈官仍誌銘之文不知艾  
削河渠志言耿叅政祭祀志言田司徒引案  
牘之語失於剪裁朱彝尊曝書亭集又謂  
其急於成書故前後複出因舉其一人兩傳  
者條其篇目為倉猝失檢之證然元史之外



駁不在於藏事之速而在於始事之驟以  
後世論之元人載籍之存者說部文集尚  
不下一二百種以訂史傳時見牴牾不能不  
畧考訂之未密其在當日重開史局距元亡  
二三年耳後世所謂古書皆當日時人之書  
也其時有未著者有著而未成者有成而  
未出者勢不能衷合衆說參定異同考徐一  
夔始豐稿有重開史局時與王禕書云近代

論史者莫過於曰歷日歷者史之根柢也至起居注之設亦專以甲子起例蓋紀事之法無踰此也元則不然不置曰歷不置起居注獨中書置時政科遣一文學掾掌之以事付史館及易一朝則國史院據所付修實錄而已其朝制原於史事固甚疎畧幸而天歷間虞集倣六典法纂經世大典一代典章文物粗備是以前局之史既有十三朝實錄

又有經世大典可以參稽厯而成書若順帝  
二十六年之事既無實錄可據又無參稽之  
書惟憑採訪以足成之竊恐事未必覈言未  
必刪首尾未必貫穿也云云則是書之疎漏  
未經屬草以前一變已預知之非盡灋等之  
過矣惟是事蹟雖難以遽詳其體例則不  
難自定其訛脫則不難自校也今觀是書三  
公宰相分為兩表禮樂合一志又分祭祀

服為兩志列傳則先及釋老次以方技皆不合前史遺規而刪除藝文一志收入列傳之中遂使無傳之人所著皆不可考尤為乖迂又帝紀則定宗以後憲宗以前闕載者三年未必寔錄之中竟無一事其為漏落顯然至於姚燧傳中述其論文之語殆不可曉証以元文類則引其送暢純甫序而互易其問答之辭殊為顛倒此不得委諸無書可檢

矣是則漁等之過無以解於後人之議者耳  
解縉集有與吏部侍郎董倫書稱元史舛  
誤承命改修云云其事在太祖末年豈非太  
祖亦覺其未善故有是命歟若夫歷志載  
許衡郭守敬之歷經李謙之歷議而并及庚  
午元歷之未嘗頒用者以証其異同地理志附  
載渚昂霄河源考而取朱思本所繹梵字圖  
書分証於下河渠志則北水兼及於盧溝河

御河南水魚及於鹽官海塘龍山河道並詳  
其繕濬之宜未嘗不可為考古之證讀者節  
取其所長可也乾隆五十四年正月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

元史卷十

明翰林學士亞中大夫知制誥兼修國史宋濂等修

本紀第一

太祖

太祖法天啓運聖武皇帝諱特穆津姓却特氏蒙古部人也其十世祖勃端察爾母曰阿倫果斡嫁托本默爾根生二子長曰布固哈塔吉次曰博克多薩勒濟固既

而夫亡阿倫果幹寡居夜寢夢白光自天窻入化為金色神來趨卧榻阿倫果幹驚覺遂有娠產一子即勃端察爾狀貌奇異沉默寡言家人謂之癡獨阿倫果幹語人曰此兒非癡後世子孫必有大貴者阿倫果幹歿諸兄分家貲不及之勃端察爾曰貧賤富貴命也貲財何足道獨乘青白馬至巴爾圖教拉之地居焉食飲無所得適有蒼鷹搏野獸而食勃端察爾以緡設機取之鷹即馴狎乃臂鷹獵兔禽以為饕或闕即繼似有天相之



居數月有民數十家自騰格哩呼喇之野逐水草來遷  
勃端察爾結茅與之居出入相資自此生理稍足一日  
仲兄忽思之曰勃端察爾獨出而無齋近者得無凍餒  
乎即自來訪邀與俱歸勃端察爾中路謂其兄曰騰格  
哩呼喇之民無所屬附若臨之以兵可服也兄以為然  
至家即選壯士令勃端察爾帥之前行果盡降之及勃  
端察爾歿子巴噶哩台哈必齊嗣生子曰瑪哈多丹瑪  
哈多丹之妻曰摩納倫生七子而寡摩納倫性素剛急

時雅賚爾部有羣小兒掘田間草根以為食摩納倫乘車出適見之怒曰此田乃我子馳馬之所羣兒輒敢壞之邪驅車徑出輾傷諸兒有至死者雅賚爾因忿怨盡驅摩納倫馬羣以去摩納倫諸子聞之不及被甲往追之摩納倫私憂曰吾兒不甲以往恐不能勝敵令子婦載甲赴之已無及矣既而果為所敗六子皆死雅賚爾遂乘勝殺摩納倫滅其家唯一長孫海都尚幼乳母匿諸積木中得免先是摩納倫第七子納沁於巴喇呼民

家為贅壻故不及難聞其家被禍來視之見病嫗十數  
與海都尚在其計無所出幸驅馬時兄之黃馬三次掣  
套竿逸歸納沁至是得乘之乃偽為牧馬者狀詣雅賚  
爾路逢父子二騎先後行臂鷹而獵納沁識其鷹曰此  
吾兄所擎者也趨前給其少者曰有赤馬引羣馬而東  
汝見之乎曰否少者乃問曰爾所經過有鳬鴈乎曰有  
曰汝可為吾前導乎曰可遂同行轉一河隈度後騎相  
去稍遠刺殺之繫馬與鷹趨迎後騎給之如初後騎問

曰前射鳬鴈者吾子也何為久卧不起耶納沁以鼻衄對騎者方怒納沁乘隙刺殺之復前行至一山下有馬數百牧者唯童子數人方擊髀石為戲納沁熟視之亦兄家物也給問童子亦如之於是登山四顧悄無來人盡殺童子驅馬臂鴈而還取海都并病嫗歸巴喇呼之地止焉海都稍長納沁率巴喇呼齊格諸民共立為君海都既立帥兵往攻雅賚爾臣屬之形勢寢大列營帳於巴喇噶罕河上跨河為梁以便往來由是四傍部族

歸之者漸衆海都歿子拜星呼爾嗣拜星呼爾歿子敦  
巴該嗣敦巴該歿子噶布勒干嗣噶布勒干歿子巴爾  
達木嗣巴爾達木歿子伊蘇克依嗣國勢愈盛大伊蘇  
克依崩至元三年十月追諡烈祖神元皇帝初烈祖征  
塔塔爾部獲其部長特穆津宣懿太后諤楞適生帝手  
握凝血如赤石烈祖異之因以所獲特穆津名之志武  
功也族人泰楚特部舊與烈祖相善後因塔爾巴哈台  
用事遂有隙絕不與通及烈祖崩帝方幼冲部衆多歸

泰楚特近侍托多呼爾察者亦將叛帝泣留之托多呼  
爾察曰深池已乾矣堅石已碎矣留復何為竟帥衆去  
宣懿太后怒其弱已也麾旗將兵躬自追叛者驅其太  
半而還時帝麾下綽奇別居薩里河扎木哈克部人托  
台奇爾居伊魯格勒泉時相侵凌掠薩里河牧馬以去  
綽奇麾下左右匿羣馬中射殺之扎木哈克以為怨與泰  
楚特諸部合謀以衆三萬來戰帝時駐軍都爾本兆蘇  
之野聞變大集諸部兵分十有三翼以俟扎木哈克至

帝與大戰破走之當是時諸部之中唯泰楚特地廣民衆號為最強其族昭壘部與帝所居相近帝常出獵偶與昭壘獵騎相屬帝謂之曰今夕可同宿乎昭壘曰同宿固所願但從者四百因糗糧不具已遣半還矣今將奈何帝固邀與宿凡其留者悉飲食之明日再合圍帝使左右驅獸向昭壘昭壘得多獲以歸其衆感之私相語曰泰楚特與我雖兄弟常攘我車馬奪我飲食無人君之度有人君之度者其惟特穆津太子乎昭壘之長

裕勒時為泰楚特所虐不能堪遂與塔海達魯領所部  
來歸將殺泰楚特以自效帝曰我方熟寐幸汝覺我自  
今車轍人跡之塗當盡奪以與汝矣已而二人不能踐  
其言復叛去塔海達魯至中路為泰楚特部人所殺昭  
壘部遂亡時帝功德日盛泰楚特諸部多苦其主非法  
見帝寬仁時賜人以裘馬心悅之若齊拉袞若哲伯若  
錫呀噶額布根諸人若多隆吉斯若扎拉爾莽果諸部  
皆慕義來降帝會諸族色辰岱酬及色辰伯奇等各以



旌車載漣酪宴于鄂諾河上帝與諸族及色辰伯奇母  
呼爾察之前共置馬潼一草囊色辰伯奇次母伊伯格  
勒前獨寘一草囊呼爾察怒曰今不尊我而貴伊伯格  
勒乎疑帝之主饒者實奇爾所為笞之遂有隙時皇弟  
伯勒格台掌帝克呼蘇魯克事

克呼蘇魯克事  
言野外牧場也

布琳掌

色辰伯奇克呼蘇魯克事布琳從者因盜馬勒伯勒格  
台執之布琳怒斫伯勒格台傷其背左右欲鬪伯勒格  
台止之曰汝等欲即復讐乎我傷者未甚姑待之不聽

各持馬乳橦疾鬪奪呼爾察和里察二哈屯以歸色辰伯奇遣使請和因令二哈屯還會塔塔爾部長摩古津掃哩圖背金約金主遣丞相完顏襄帥兵逐之北走帝聞之發近兵自鄂諾河迎擊仍諭色辰伯奇帥部人來助候六日不至帝自與戰殺摩古津掃哩圖盡虜其輜重帝之麾下有為奈曼部人所掠者帝欲討之復遣六十人徵兵於色辰伯奇色辰伯奇以舊怨之故殺其十人去五十人衣而歸之帝怒曰色辰伯奇曩答我實奇

爾斫傷我伯勒格台今又敢乘敵勢以陵我耶因帥兵  
踰沙磧攻之殺虜其部衆唯色辰岱酬僅以妻孥免越  
數月帝復伐色辰岱酬追至圖烈圖之隘滅之克呼部  
扎實甘布來歸扎實甘布者部長王汗之弟也王汗名  
托里受金封爵為王番言音重故稱王為王汗初王汗  
之父呼爾察和斯必瑠既卒王汗嗣位多殺戮昆弟其  
叔父珠爾帥兵與王汗戰逼於哈拉衮隘敗之僅以百  
餘騎脫走來奔于烈祖烈祖親為將兵逐珠爾走西夏

復奪部衆歸于王汗王汗德之遂相與為盟稱為諳達  
烈祖崩王汗之弟額爾克哈喇怨王汗多殺之故復叛  
歸奈曼部奈曼部長伊納克齊為發兵伐王汗盡奪其  
部衆與之王汗走河西回鶻回回三國奔契丹既而復  
叛歸中道糧絕將羊乳為飲刺橐駝血為食困乏之甚  
帝以其與烈祖交好遣近侍往招之帝親迎撫勞安置  
軍中振給之遂會于圖喇河上尊王汗為父未幾帝伐  
默爾奇斯部與其部長托克托戰于瑪尼齊山掠其貳

財田未以遺王汗王汗因此部衆稍集居亡何王汗自以其勢足以有為不告於帝獨率兵攻默爾奇斯部部人敗走托克托奔博囉呼察監王汗大掠而還於帝一無所遺帝不以屑意會奈曼部長博囉汗不服帝復與王汗征之至克實克巴克實之野遇其前鋒額特圖博囉領百騎來戰見軍勢漸逼走據高山其馬鞍轉墜擒之曾未幾何帝復與奈曼部驍將齊蘇實巴爾二人遇會日暮各還營壘約明日戰是夜王汗多燃火營中示

人不疑潛移部衆於別所及旦帝始知之因頗疑其有異志退師薩里河既而王汗亦還至圖喇河王汗子伊勒哈及其叔扎實甘布來會齊蘇等察知之乘其不備襲虜其部衆于道伊勒哈奔告王汗王汗命伊勒哈與布爾古特共追之且遣使來曰奈曼不道掠我人民太子有四良將能假我以雪恥乎帝頓釋前憾遂遣保爾濟穆呼哩博囉罕齊拉袞四人帥師以往師未至伊勒哈已追及齊蘇與之戰大敗布爾古特已成擒流矢中

伊勒哈馬勝幾為所獲須臾四將至擊奈曼走盡奪所掠歸王汗已而與皇弟哈扎爾再伐奈曼拒鬪於和倫扎色山大敗之盡殺其諸將族衆積屍以為京觀奈曼之勢遂弱時秦楚特猶強帝會王汗於薩里河與秦楚特部長杭呼等大戰鄂諾河上敗走之斬獲無算哈塔錦部薩勒珠特部都爾本部塔塔爾部鴻吉哩部間奈曼秦楚特皆敗咸不自安會於阿魯泉斬白馬為誓欲襲帝及王汗鴻吉哩部長岱音恐事不成潛遣人告變

帝乃與王汗自呼圖澤逆戰於拜里川又大敗之王汗  
遂分兵自伊拉哩河而行扎實甘布謀於阿敦愛寶伊  
克托爾等曰我兄性行不常既屠絕我昆弟我輩又豈  
得獨全乎阿敦愛寶泄其言王汗令執伊克托爾等至  
帳下解其縛且謂伊克托爾曰吾輩由西夏而來道路  
饑困其相誓之語遽忘之乎因唾其面坐上之人皆起  
而唾之王汗又屢責扎實甘布至於不能堪扎實甘布  
與伊克托爾等俱奔奈曼帝駐軍於察察爾山起兵伐



塔塔爾部部長敖拉溫都爾等來逆戰大敗之時鴻吉哩欲來附哈扎爾不知其意往掠之於是鴻吉哩歸扎木哈克部與都爾本伊奇拉斯哈塔錦果囉囉塔塔爾薩勒珠特諸部會於犍河共立扎木哈克為楚勒罕盟于圖拉必喇河岸誓曰凡我同盟有洩此謀者如岸之摧如林之伐誓畢共舉足躡岸揮刀斫林驅士卒來侵塔海罕斯在衆中與帝麾下超爾結為昏姻超爾偶往視之具知其謀即還至帝所悉以其謀告之帝即起兵

逆戰於哈里雅爾台和囉噶之地破之扎木哈克走鴻  
吉哩部來降歲壬戌帝發兵於烏爾呼薩勒扎河伐昂  
齊塔塔爾察罕塔塔爾二部先誓師曰苟破敵逐北見  
棄遺物慎無獲俟軍事畢散之及勝族人阿勒坦呼察  
爾達哩台三人背約帝怒盡奪其所獲分之軍中初托  
克托敗走博囉呼察隘既而復出為患帝帥兵討走之  
至是又會奈曼部博囉汗約都爾本塔塔爾哈塔錦薩  
勒珠特諸部來侵帝遣騎乘高四望知奈曼兵漸至帝

與王汗移軍入塞伊勒哈自北邊來據高山結營奈曼軍衝之不動遂還伊勒哈尋亦入塞將戰帝遷輜重於他所與王汗伊阿蘭塞為壁大戰于吹丹之野奈曼使神巫祭風雪將欲因其勢進攻既而反風逆擊其陣奈曼軍不能戰欲引還雪滿溝澗帝勒兵乘之奈曼大敗是時扎木哈克起兵援奈曼見其敗即還道經諸部之立已者大縱掠而去帝欲為長子卓沁求昏於王汗女超爾必濟王汗之子托斯和亦欲尚帝女噶沁必濟俱

不諧自是頗有違言初帝與王汗合軍攻奈曼約明日戰扎木哈克言於王汗曰我與君是白翎雀他人是鴻鴈耳白翎雀寒暑常在北方鴻鴈遇寒則南飛就暖耳意謂帝心不可保也王汗聞之疑遂移部衆於別所及議昏不成扎木哈克乘隙謂伊勒哈曰太子雖言是王汗之子嘗通信於奈曼將不利於君父子君能加兵我當從傍助君也伊勒哈信之會達哩台呼濟爾阿勒坦等叛歸伊勒哈亦說之曰我等願佐君討宣懿太后諸

子也伊勒哈大喜遣使告王汗王汗曰扎木哈克巧言寡信人也不足聽伊勒哈力言之使者往返者數四王汗曰吾身之存實太子是賴髭鬚已白遺骸無得安寢汝乃喋喋不已耶汝善自為之母貽吾憂也扎木哈克遂縱火焚帝牧地而去歲癸亥王汗父子謀欲害帝乃遣使者來曰向者所議媼事今當相從請來飲布琿察爾

布琿察爾華言許親酒也

帝以為然率十騎赴之至中道心有所

疑命一騎往謝帝遂還王汗謀既不成議舉兵來侵圍

人齊里克齊聞其事密與弟巴達告帝帝即馳軍阿蘭塞悉移輜重於他所遣哲哩木為前鋒俟王汗至即整兵出戰先與珠勒根部遇次與董阿部遇又次與浩爾實勒們部遇皆敗之最後與王汗親兵遇又敗之伊勒哈見勢急突來衝陣射之中頰即斂兵而退於是奇味部人棄王汗來降王汗既敗而歸帝亦將兵還至棟格澤駐軍遣阿里哈致責於王汗曰君為叔父珠爾所逐困迫來歸我父即攻珠爾敗之於河西其土地人民盡

收與君此大有功於君一也君為奈曼所攻西奔日沒  
處君弟札實甘布在金境我遣人召還比至又為默爾  
奇斯部人所逼我請我兄色辰伯奇及我弟岱酬往殺  
之此大有功於君二也君困迫來歸時我過哈達拉歷  
掠諸部羊馬貲財盡以奉君不半月間令君饑者飽瘠  
者肥此大有功於君三也君不告我往掠默爾奇斯大  
獲而還未嘗以毫髮分我我不以為意及君為奈曼所  
傾覆我遣四將奪還爾民人重立爾國家此大有功於

君四也我征都爾本塔塔爾哈塔錦薩勒珠特鴻吉哩  
五部如海東驚禽之於鵝鴈見無不獲獲則必致於君此  
大有功於君五也是五者皆有明驗君不報我則已今  
乃易恩為讐而遽加兵於我哉王汗聞之語伊勒哈曰  
我向者之言何如吾兒宜識之伊勒哈曰事勢至今日  
必不可已惟有竭力戰鬪我勝則并彼彼勝則并我耳  
多言何為時帝諸族阿勒坦呼濟爾在王汗左右帝因  
遣阿里哈誚責王汗就令告之曰昔者吾國無主以色



辰岱酬二人實我伯祖巴勒噶特之裔欲立之二人固  
辭乃以汝呼濟爾為伯父訥袞之子又欲立之汝又固  
辭然事不可中輟復以汝阿勒坦為我祖呼都拉之子  
又欲立之汝又固辭於是汝等推戴吾為之主初豈我  
之本心哉不自意相迫至於如此也三河祖宗肇基之  
地母為他人所有汝善事王汗王汗性無常遇我尚如  
此況汝輩乎我今去矣我今去矣阿勒坦等無一言帝  
既遣使於王汗遂進兵虜鴻吉哩別部尼勒堅行至班

朱爾河水方渾帝飲之以誓衆有伊奇喇斯部人布圖者為果囉囉部所敗因遇帝與之同盟哈扎爾別居哈拉衮山妻子為王汗所虜挾幼子托歡走糧絕探鳥卵為食來會于河上時王汗形勢盛強帝微弱勝敗未可知衆頗危懼凡與飲河水者謂之飲渾水言其曾同艱難也王汗兵至帝與戰于哈喇克沁沙圖之地王汗大敗阿勒坦呼濟爾扎木哈克等謀殺王汗弗克奔奈曼達哩台巴林等部稽顙來降帝移軍鄂諾河源謀攻王

汗復遣二使往王汗偽為哈扎爾之言曰我兄太子今  
既不知所在我之妻孥又在王所縱我欲往將安所之  
耶王儻棄我前愆念我舊好即束手來歸矣王汗信之  
因遣人隨二使來以皮囊盛血與之盟及至即以二使  
為向導令軍士銜枚夜趨徹辰圖山出其不意襲攻王  
汗敗之盡降克哱部衆王汗與伊勒哈挺身遁去王汗  
嘆曰我為吾兒所誤今日之禍悔將何及王汗出走路  
逢奈曼部將遂為其所殺伊勒哈走西夏日剽掠以自

資既而亦為西夏所攻走至龜茲國龜茲國主以兵討殺之帝既滅王汗大獵於特默格川宣布號令振凱而還時奈曼部長廸延汗心忌帝能遣使謀於巴達勒達部主阿魯哈斯曰聞東方有稱帝者天無二日民豈有二王耶君能益吾右翼吾將奪其弧矢也阿魯哈斯即以是謀報帝居無何舉部來歸歲甲子帝大會於特默格川議伐奈曼羣臣以方春馬瘦宜俟秋高為言皇弟鄂齊錦曰事所當為斷之在早何可以馬瘦為辭伯勒

格台亦曰奈曼欲奪我弧矢是小我也我輩義當同死  
彼恃其國大而言誇苟乘其不備而攻之功當可成也  
帝悅曰以此衆戰何憂不勝遂進兵伐奈曼駐兵於心  
達罕山先遣呼必哩哲伯二人為前鋒迪延汗至自阿  
勒台營於杭愛山與默爾奇斯部長托克托克呼部長  
阿林台實衛喇特部長呼圖克伯奇暨都爾本塔塔爾  
哈塔錦薩勒珠特諸部合兵勢頗盛時我軍羸馬有驚  
入奈曼營者迪延汗見之語衆曰蒙古馬瘦如此今當

誘其深入然後戰而擒之其將呼圖蘇伯奇對曰先王  
戰伐勇進不回馬尾人背不使敵人見之今為此遷延  
之計得非心中有所懼乎苟懼之何不令后妃來統軍  
也迪延汗怒即躍馬索戰帝以哈扎爾主中軍時扎木  
哈克從迪延汗來見我軍整肅謂左右曰奈曼初舉兵  
視蒙古軍若韃靼兒意謂蹄皮亦不留今吾觀其氣  
勢殆非往時矣遂引所部兵遁去是日帝與奈曼軍大  
戰至晡禽殺迪延汗諸部軍一時皆潰夜走絕險墜崖

死者不可勝計明日餘衆悉降於是都爾本塔塔爾哈  
塔錦薩勒珠特四部亦降已而復征默爾奇斯其長托  
克托奔迪延汗之兄博囉汗其屬岱爾誇遜獻女迎降  
俄復叛去帝至台哈寨遣博爾歡錫伯二人領左右軍  
平之歲乙丑帝征西夏拔拉伊哩寨經羅索城大掠人  
民及其索馳而還

元年丙寅帝大會諸王羣臣建九旂白旗即皇帝位於  
鄂諾河之源諸王羣臣共上尊號曰青吉斯皇帝是歲

實金泰和之六年也帝既即位遂發兵復征奈曼時博囉汗獵於烏爾圖山禽之以歸迪延汗子庫楚類汗與托克托奔雅爾達實河上帝始議伐金初金殺帝宗親罕布海汗帝欲復讐會金降俘等具言金主璟肆行暴虐帝乃定議致討然未敢輕動也

二年丁卯秋再征西夏剋衛喇喀城是歲遣阿勒坦保喇二人使奇爾濟蘇既而伊德爾訥呼部阿勒達爾部皆通使來獻名鷹



三年戊辰春帝至自西夏夏避暑龍庭冬再征托克托  
及庫楚類汗時衛喇特部等遇我前鋒不戰而降因用  
為向导至雅爾達實河討默爾奇斯部滅之托克托中  
流失死庫楚類汗奔契丹

四年己巳春輝和爾國來歸帝入河西夏主李安全遣  
其世子率師來戰敗之獲其副元帥高令公剋烏梁海  
城俘其太傅西壁氏進至克夷門復敗夏師獲其將威  
明令公薄中興府引河水灌之堤決水外潰遂撤圍還

遣太傅額特入中興招諭夏主夏主納女請和

五年庚午春金謀來伐築烏沙堡帝命哲伯襲殺其衆  
遂略地而東初帝貢歲幣于金金主使衛王允濟受貢  
於靜州帝見允濟不為禮允濟歸欲請兵攻之會金主  
璟殂允濟嗣位有詔至國傳言當拜受帝問金使曰新  
君為誰金使曰衛王也帝遽南面唾曰我謂中原皇帝  
是天上人做此等庸懦亦為之耶何以拜為即乘馬北  
去金使還言允濟益怒欲俟帝再入貢就進場害之帝

知之遂與金絕益嚴兵為備

六年辛未春帝居吉魯爾河西域哈喇婁部主阿爾斯  
蘭汗來降輝和爾國主伊都呼來覲二月帝自將兵南  
伐敗金將達實於野狐嶺取大水灤豐利等縣金復築  
烏沙堡秋七月哲伯攻拔烏沙堡及烏月營八月帝及  
金師戰于宣平之會河川敗之九月拔德興府居庸關  
守將遁去哲伯遂入關抵中都冬十月襲金羣牧監驅  
其馬而還耶律阿哈降入見帝于行在所皇子卓沁察

罕台誘格德依分徇雲內東勝武朔等州下之是冬駐蹕金之北境劉伯林瓜爾佳常格等來降

七年壬申春正月耶律瑠格聚衆于隆安自為都元帥遣使來附帝破昌桓撫等州金將赫舍哩糾堅等率兵三十萬來援帝與戰于獯兒背大敗之秋圍西京金元帥左都監鄂通襄率師來援帝遣兵誘至密谷口逆擊之盡殪復攻西京帝中流矢遂撤圍九月察罕剋奉聖州冬十二月甲申哲伯攻東京不拔即引去夜馳還襲

克之

八年癸酉春耶律瑠格自立為遼王改元元統秋七月  
克宣德府遂攻德興皇子圖類駙馬齊奇先登拔之帝  
進至懷來及金行省完顏綱元帥高琪戰敗之追至古  
北口金兵保居庸詔克特卜齊守之遂趨涿鹿金西京  
留守呼沙呼遁帝出紫荆關敗金師于五回嶺拔涿易  
二州契丹烏蘭巴爾等獻北口哲伯遂取居庸與克特  
卜齊會八月金呼沙呼弑其主允濟迎豐王珣立之是

秋分兵三道命皇子卓沁察罕台諤格德依為右軍循  
太行而南取保遂安肅安定邢洛磁相衛輝懷孟掠澤  
潞遼沁平陽太原吉陽拔汾石嵐忻代武等州而還皇  
弟哈扎爾及汪沁諾延卓齊特博恰為左軍遵海而東  
取薊州平灤遼西諸郡而還帝與皇子圖賴為中軍取  
雄霸莫安河間滄景獻深祁蟲冀恩濮開滑博濟泰安  
濟南濱棣益都淄濰登萊沂等郡復命穆呼哩攻密州  
屠之史天倪蕭博特率衆來降穆呼哩承制竝以為萬

戶帝至中都三道兵還合屯大口是歲河北郡縣盡拔  
唯中都通順真定清沃大名東平德鄆海州十一城不  
下

九年甲戌春三月駐蹕中都北郊諸將請乘勝破燕帝  
不從乃遣使諭金主曰汝山東河北郡縣悉為我有汝  
所守惟燕京耳天既弱汝我復迫汝於險天其謂我何  
我今還軍汝不能犒師以弭我諸將之怒耶金主遂遣  
使求和奉衛紹王女岐國公主及金帛童男女五百馬

三千以獻仍遣其丞相完顏福興送帝出居庸夏五月  
金主遷汴以完顏福興及叅政穆延盡忠輔其太子守  
忠留守中都六月金紇軍卓多等殺主帥率衆來降詔  
薩木哈舒穆魯明安與卓多等圍中都帝避暑魚兒灤  
秋七月金太子守忠走汴冬十月穆呼哩征遼東高州  
盧琮金扑等降錦州張鯨殺其節度使自立為臨海王  
遣使來降

十年乙亥春正月金右副元帥富察齊錦以通州降以



齊錦為元帥二月穆呼哩攻北京金元帥烏庫哩音達  
琿以城降以音達琿為留守烏頁爾權兵馬都元帥鎮  
之興中府元帥石天應來降以天應為興中府尹三月  
金御史中丞李英等率師援中都戰于霸州敗之夏四  
月克清順二州詔張鯨總北京十提控兵從南征鯨謀  
叛伏誅鯨弟致遂據錦州僭號漢興皇帝改元興龍五  
月庚申金中都留守完顏福興仰藥死穆延盡忠棄城  
走明安入守之是月避暑桓州涼涇遣呼圖克等籍中

都帑藏秋七月紅羅山寨主杜秀降以秀為錦州節度使遣伊奇哩往諭金主以河北山東未下諸城來獻及去帝號為河南王當為罷兵不從詔史天倪南征授右副都元帥賜金虎符八月天倪取平州金經略使奇珠降穆呼哩遣史進道等攻廣寧府降之是秋取城邑凡八百六十有二冬十月金宣撫布希萬努據遼東僭稱天王國號大真改元天泰十一月耶律瑠格來朝以其子實沙入侍史天祥討興州擒其節度使趙守玉

十一年丙子春還臚胸河行宮張致陷興中府穆呼哩  
討平之秋錫里濟額特薩木哈巴圖爾率師由西夏趨  
關中遂越潼關獲金西安軍節度使尼瑪哈富勒呼拔  
汝州等郡抵汴京而還冬十月布希萬努降以其子特  
爾格入侍既而復叛僭稱東夏

十二年丁丑夏盜祁和尚據武平史天祥討平之遂擒  
金將巢元帥以獻察罕破金監軍瓜爾佳於霸州金求  
和乃還秋八月詔以穆呼哩為太師封國王將蒙古虜

漢諸軍南征拔遂城蠡州冬克大名府遂東定益都淄  
登萊濰密等州是歲圖們部民叛命布林都爾伯討平  
之

十三年戊寅秋八月兵出紫荆口獲金行元帥事張柔  
命還其舊職穆呼哩自西京入河東克太原平陽及忻  
代澤潞汾霍等州金將武仙攻滿城張柔擊敗之是年  
伐西夏圍其王城夏主李遵頊出走西涼契丹祿格據  
高麗江東城命浩沁扎拉率師平之高麗王瞰遂降請

歲貢方物

十四年己卯春張柔敗武仙降祁陽曲陽中山等城夏  
六月西域殺使者帝親征遂取鄂托喇爾城擒其酋哈  
濟爾濟蘭圖秋穆呼哩克奇嵐吉隱等州進攻絳州拔  
其城屠之

十五年庚辰春三月帝克布哈城夏五月克塔什干城  
駐蹕頁實勒提斯河秋攻克鄂托羅爾城穆呼哩徇地  
至真定武仙出降以史天倪為河北西路兵馬都元帥

行府事仙副之東平嚴實籍彰德大名磁洺恩博滑濬等州戶三十萬來歸穆呼哩承制授實金紫光祿大夫行尚書省事冬金邢州節度使武貴降穆呼哩攻東平不克留嚴實守之撤圍趨洺州分兵徇河北諸郡是歲授董俊龍虎衛上將軍右副都元帥

十六年辛巳春帝攻布哈爾賽瑪爾堪等城皇子卓沁攻安集延巴爾昌等城並下之夏四月駐蹕鐵門關金主遣烏克遜仲端奉國書請和稱帝為兄不允金東平

行省事孟古棄城遁嚴實入守之宋遣苟夢玉來請和  
夏六月宋漣水忠義統轄石珪來降以珪為濟兗單三  
州總管秋帝攻巴喇勒哈等城皇子卓沁察罕台諤格  
德依攻玉隴哈什等城下之冬十月皇子圖類克瑪勒  
濟里克瑪勒齊阿喇斯等城穆呼哩出河西克葭綏德  
保安廊坊丹等州進攻延安不下十一月宋京東安撫  
使張琳以京東諸郡來降以琳為滄景瀕棣等州行都  
元帥是歲詔諭德順州

十七年壬午春皇子圖類克圖舍尼綽爾等城還軍經  
穆壘國大掠之遂渡楚楚拉河克伊拉等城乃與帝會  
合兵攻塔爾哈寨拔之穆呼哩軍克乾涇邠原等州攻  
鳳翔不下夏避暑塔爾哈寨西域主扎拉鼎出奔與瑪  
里克汗合呼圖克與戰不利帝自將擊之擒瑪里克汗  
扎拉鼎遁去遣巴拉追之不獲秋金復遣烏克遜仲端  
來請和見帝于回鶻國帝謂曰我向欲汝主授我河朔  
地今汝主為河南王彼此罷兵汝主不從今穆呼哩已



盡取之乃始來請耶仲端乞哀帝曰今汝遠來河朔既  
為我有關西數城未下者其割付我令汝主為河南王  
勿復違也仲端乃歸金平陽公胡天祚以青龍堡降冬  
十月金河中府來附以石天應為兵馬都元帥守之  
十八年癸未春三月太師國王穆呼哩費夏避暑帕爾  
滿川皇子卓沁察罕台諤格德依及巴拉兵來會遂定  
西域諸城置達魯噶齊監治之冬十月金主珣殂子守  
緒立是歲宋復遣苟夢玉來

十九年甲申夏宋大名總管彭義斌侵河北史天倪與戰于恩州敗之是歲帝至東印度國角端見班師

二十年乙酉春正月還行宮二月武仙以真定叛殺史天倪董俊判官李全亦以中山叛三月史天澤擊仙走之復真定夏六月彭義斌以兵應仙天澤禦於贊皇擒斬之

二十一年丙戌春正月以西夏納仇人竇勒噶克織昆及不遣質子詔親征二月取黑水等城夏避暑瑄楚山

取甘肅等州秋取西涼府綽羅和拉等縣遂踰沙陀至  
黃河九渡取雅爾等縣九月李全執張琳郡王岱遜進  
兵圍全於益都冬十一月庚申帝攻靈州夏遣威明令  
公來援丙寅帝渡河擊夏師敗之丁丑五星聚見于西  
南駐蹕鹽州川十二月李全降授張柔行軍千戶保州  
等處都元帥是歲皇子諤格德依及察罕之師圍金南  
京遣唐慶責歲幣千金

二十二年丁亥春帝留兵攻夏王城自率師渡河攻積

石州二月破臨洮府三月破洮河西寧二州遣旺沁諾  
延攻信都府拔之夏四月帝次龍德拔德順等州德順  
節度使愛申進士馬肩龍死焉五月遣唐慶等使金閏  
月避暑六盤山六月金遣完顏哈昭鄂屯阿古來請和  
帝謂羣臣曰朕自去冬五星聚時已嘗許不殺掠遽忘  
下詔耶今可布告中外令彼行人亦知朕意是月夏主  
李覲降帝次清水縣西江秋七月壬午不豫己丑崩于  
薩里川哈喇圖之行宮臨崩謂左右曰金精兵在潼關

南據連山北限大河難以遽破若假道于宋宋金世讐  
必能許我則下兵唐鄧直搗大梁金急必徵兵潼關然  
以數萬之衆千里赴援人馬疲弊雖至弗能戰破之必  
矣言訖而崩壽六十六葬起輦谷至元三年冬十月追  
諡聖武皇帝至大二年冬十一月庚辰加諡法天啓運  
聖武皇帝廟號太祖在位二十二年帝深沉有大略用  
兵如神故能滅國四十遂平西夏其奇勲偉跡甚衆惜  
乎當時史官不備或多失於紀載云

戊子年是歲皇子圖類監國

元史卷一

元史卷一考證

阿倫果斡寡居 阿倫果斡原文作阿蘭果火史蒙上

文刪省但稱阿蘭於音譯未合今以全名改對下倣此

托端呼爾察曰 原文作脫端曰按上文作脫端火免真未可但稱脫端今以全名譯對

若哲伯 原文作哲別卷後又作遮別他卷又作只別者別闕別皆以音近而訛今併改哲伯

額布根

原文作也不干各卷又訛作也不堅阿卜干

今併改

宴子鄂諾阿上

原文作幹難河他卷又作阿難又訛

作兀難今併改

遂會于圖喇河上

原文作土兀喇河他卷又訛作禿

忽刺今併改

會奈曼部長博羅漢

原文作不魯欲罕卷後又作孟

魯可漢今併改



博囉罕

原文作博爾忽他卷又作博爾渾今併改

已而與皇弟哈扎爾再伐奈曼

弟原文作帝考世系

表哈扎爾為太祖昆弟行帝弟音近且當時國俗有  
大皇帝二皇帝之稱修史者遂沿其妄卷後鄂齊錦  
為烈祖第四子亦稱皇帝可證然於名義不合今並

改正

薩勒珠特

原文作散只兀他卷又作散只兒今併改

伊奇喇斯

原文作亦乞刺思他卷又作亦其列思亦

啟烈思今併改

長子卓沁

原文作木赤考之世系表及紀傳所載作

木赤亦作拙赤木木形似木拙音同今併改

歲癸亥

原文作癸丑考是年為章宗泰和三年越二

二年而太祖稱帝是為丙寅況以前壬戌後乙丑計

之亦不當有癸丑今據改

為果囉囉部所敗

原文作火魯剌部即卷前火魯剌

思部係脫字今依前譯改

皇弟鄂齊錦

原文作皇帝幹赤斤幹赤斤他卷又訛

作幹真今併改帝改弟說見前

元年迪延汗子庫楚類汗

原文作屈出律罕他卷又

作曲書律罕屈曲音近書出字以草體相似而訛今

併改

二年使奇爾濟蘓

原文作乞力吉思他卷又作乞里

吉思曲列吉思今併改

十年金元帥烏庫哩音達琿以城降

原文作寅荅虎

烏古論烏古論改烏庫哩考烏庫哩為金之著姓若是兩人不當一稱名而一舉姓此字金宣宗本紀未載蘇天爵名臣事畧載穆呼哩攻北京金守將銀青嬰城自守其將高玉等殺銀青共推烏庫哩音達琿為帥未幾以城降核之續通鑑亦同為太祖九年事年月雖不符而姓名則合且以下文以音達琿為留守文義考之其為名氏顛倒無疑今據改

金宣撫布希萬努據遼東 按塔斯傳云從定宗於潛

耶東征擒金咸平宣撫完顏萬努於遼東萬努自乙亥歲率衆保東海至是平之乙亥為太祖十年與本紀合考布希 原文作蒲鮮為金之庶姓完顏為金之國姓無一人兩姓之理紀傳必有一誤或當時賜姓則未可知但萬努於金史無專傳無憑訂正姑從闕疑

十六年帝攻布哈爾 原文作卜合兒他卷又作孛合里又作不花剌今併改

二十一年丙戌 按史例編年皆紀以干支此獨失繫  
今增載後倣此

欽定四庫全書

元史卷二

明翰林學士亞中大夫知制誥兼修國史宋濂等修

本紀第二

太宗

太宗英文皇帝諱誥格德依太祖第三子母曰光獻皇后鴻吉哩氏太祖伐金定西域帝攻城略地之功居多太祖崩自和博果之地來會喪

元年己丑夏至固爾班蘇巴克之地皇弟圖類來見秋八月己未諸王百官大會於吉魯爾河齊達勒敖拉地以太祖遺詔即皇帝位于奎騰阿喇勒始立朝儀皇族尊屬皆拜頒大札薩克

華言大法令也

金遣阿固岱來歸太祖

之賄帝曰汝主久不降使先帝老于兵間吾豈能忘也賄何為哉却之遂議伐金敕蒙古民有馬百者輸牝馬一牛百者輸牯牛一羊百者輸羴羊一為永制始置倉廩立驛傳命河北漢民以戶計出賦調耶律楚材主之



西域人以丁計出賦調瑪哈穆第哈喇斯密主之印度國主穆壘國主來朝西域伊始巴爾城酋長來降是歲金復遣使來聘不受

二年庚寅春正月詔自今以前事勿問定諸路課稅酒課驗實息十取一雜稅三十取一是春帝與圖類獵于諤爾根河遂遣兵圍京兆金主率師來援敗之尋拔其城夏避暑塔密爾河多果朗及金兵戰敗績命蘇布特援之秋七月帝自將南伐皇弟圖類皇姪莽賚和率師

從拔天成等堡遂渡河攻鳳翔冬十一月始置十路徵收課稅使以陳時可趙昉使燕京劉中劉桓使宣德周立和王貞使西京呂振劉子振使太原楊簡高廷英使平陽王晉賈從使真定張瑜王銳使東平王德亨侯顯使北京瓜爾佳永程泰使平州田木西李天翼使濟南是月攻潼關藍關不克十二月拔天勝寨及韓城蒲城三年辛卯春二月克鳳翔攻洛陽河中諸城下之夏五月避暑于九十九泉命圖類出師寶鷄遣綽布于使宗

假道宋殺之復遣李國昌使宋需糧秋八月幸雲中始立中書省改侍從官名以耶律楚材為中書令鈕祜祿珠順為左丞相鎮海為右丞相是月以高麗殺使者命薩里台往討之取四十餘城高麗王瞰遣其弟懷安公請降薩里台承制設官分鎮其地乃還冬十月乙酉帝圍河中十二月己未拔之

四年壬辰春正月戊子帝由白坡渡河庚寅圖類渡漢江遣使來報即詔諸軍進發甲午次鄭州金防城提控

馬伯堅降授伯堅金符使守之丙申大雪丁酉又雪次  
新鄭是日圖類及金師戰于鈞州之三峯大敗之獲金  
將布哈戊戌帝至三峯壬寅攻鈞州克之獲金將哈達  
遂下商號嵩汝陝洛許鄭陳亳潁壽睢永等州三月命  
蘇布特等圍南京金主遣弟曹王額爾克入質帝還留  
蘇布特守河南夏四月出居庸避暑官山高麗叛殺所  
置官吏徙居江華島秋七月遣唐慶使金諭降金殺之  
八月薩里台復征高麗中矢卒金叅政完顏色埒恒山

公武仙救南京諸軍與戰敗之九月圖類薨帝還龍庭  
冬十一月獵于納琳齊拉衮之野十二月如太祖行宮  
五年癸巳春正月庚申金主奔歸德戊辰金西面元帥  
崔立殺留守完顏納新完顏薩尼雅布以南京降二月  
辛托里圖地詔諸王議伐萬努遂命皇子庫裕克及諸  
王阿齊台將左翼軍討之夏四月蘇布特進至青城崔  
立以金太后王氏后圖克坦氏梁王從恪荆王守純等  
至軍中蘇布特遣送行在遂入南京六月金主奔蔡塔

齊爾率師圍之詔以孔子五十一世孫元措襲封衍聖公秋八月獵于額伯蘇地以阿克棟阿克宣差勘事官括中州戶得七十三萬餘九月擒萬努冬十一月宋遣荆鄂都統孟珙以兵糧來助十二月諸軍與宋兵合攻蔡敗武仙于息州金人以海沂萊濰等州降是冬帝至阿魯烏格衮行宮大風霾七晝夜敕修孔子廟及渾天儀

六年甲午春正月金主傳位于宗室子承麟遂自經而

焚城拔獲承麟殺之宋兵取金主餘骨以歸金亡是春  
會諸王宴射于鄂爾根河夏五月帝在達蘭達巴之地  
大會諸王百僚諭條令曰凡當會不赴而私宴者斬諸  
出入宮禁各有從者男女止以十人為朋出入毋得相  
雜軍中凡十人置甲長聽其指揮專擅者論罪其甲長  
以事來宮中即置權攝一人甲外一人二人不得擅自  
往來違者罪之諸公事非當言而言者拳其耳再犯笞  
三犯杖四犯論死諸千戶越萬戶前行者隨以木鐻射

之百戶甲長諸軍有犯其罪同不遵此法者斥罷今後  
來會諸軍甲內數不足於近翼抽補足之諸人或居室  
或在軍毋敢喧呼凡來會用善馬五十足為一羈守者  
五人飼羸馬三人守克呼蘇嚕克三人但盜馬一二者  
即論死諸人馬不應絆於克呼蘇嚕克內者輒沒與畜  
虎豹人諸婦人製濟遜燕服不如法者及妬者乘以騾  
牛徇部中論罪即聚財為更娶秋七月以呼圖克諾延  
為中州斷事官遣達海甘布征蜀帝在巴爾斯達蘭達



巴之地議自將伐宋國王札拉呼請行遂遣之冬獵于  
托卜輝罕地

七年乙未春城和琳作萬安宮遣諸王巴圖皇子庫裕  
克皇姪莽賚扣征西域皇子奎騰征秦鞏皇子庫春及  
呼圖克伐宋唐古征高麗秋九月諸王琨布哈獲宋何  
太尉冬十月庫春圍棗陽拔之遂徇襄鄧入郢虜人民  
牛馬數萬而還十一月奎騰攻石門金便宜都總帥汪  
世顯降中書省臣請契勘大明厯從之

八年丙申春正月諸王各治具來會宴萬安宮落成詔  
印造交鈔行之二月命應州郭勝鈞州富珠哩玖珠鄧  
州趙祥從庫春充先鋒伐宋三月復修孔子廟及司天  
臺夏六月復括中州戶口得續戶一百一十餘萬耶律  
楚材請立編修所於燕京經籍所於平陽編集經史召  
儒士梁陟充長官以王萬慶趙著副之秋七月命陳時  
可閱刑名科差課稅等案赴闕磨照詔以真定民戶奉  
太后湯沐中原諸州民戶分賜諸王貴戚鄂爾多巴圖

平陽府察罕台太原府古裕大名府博囉台邢州古魯  
格河間府布爾古特廣寧府伊克益都濟南二府戶內  
撥賜阿齊台濱棣州旺沁諾延平灤州皇子奎騰駙馬  
徹庫公主阿勒哈公主果戢國王扎拉呼察罕台丹津  
蒙古罕扎昂吉諾延青諾延和斯濟蘇竝於東平府戶  
內撥賜有差耶律楚材言非便遂命各位止設達魯噶  
齊朝廷置官吏收其租頒之非奉詔不得徵兵賦奎騰  
率汪世顯等入蜀取宋關外數州斬蜀將曹友聞冬十

月奎騰入成都詔招諭秦鞏等二十餘州皆降皇子庫  
春薨張柔等攻郢州拔之襄陽府來附以游顯領襄陽  
樊城事

九年丁酉春獵于齊齊克察罕澤莽賚扣征欽察破之擒  
其酋巴齊瑪克夏四月築縑琳城作格根察罕殿六月  
左翼諸部訛言括民女帝怒因括以賜麾下秋八月命  
摩和納劉中試諸路儒士中選者除本貫議事官得四  
千三十人冬十月獵于野馬川幸龍庭遂至行宮是冬

琨布哈帥師圍光州命張柔鞏彥暉史天澤攻下之遂別攻蘄州降隨州略地至黃州宋懼請和乃還

十年戊戌春塔斯軍至北峽關宋將汪統制降夏襄陽別將劉義叛執游顯等降宋宋兵復取襄樊帝獵于齊齊克察罕澤築托斯和城作迎駕殿秋八月陳時可高慶民等言諸路旱蝗詔免今年田租仍停舊未輸納者俟豐歲議之

十一年己亥春復獵于齊齊克察罕澤皇子奎騰軍至

自西川秋七月游顯自宋逃歸以山東諸路災免其稅糧冬十一月莽賚扣率師圍烏蘇木奇城閱三月拔之十二月商人溫都爾哈瑪爾買撲中原銀課二萬二千錠以四萬四千錠為額從之

十二年庚子春正月以溫都爾哈瑪爾充提領諸路課稅所官皇子庫裕克克西域未下諸部命張柔等八萬戶往伐宋冬十二月詔庫裕克班師敕州郡失盜不獲者以官物償之國初令民代償民多亡命至是罷之是

歲以官民貸回鵲金償官者歲加倍名羊羔息其害為甚詔以官物代還凡七萬六千錠仍命凡假貸歲久惟子本相侔而止著為令籍諸王大臣所俘男女為民十三年辛丑春二月獵于齊齊克察罕澤帝有疾詔赦天下囚徒帝瘳秋高麗國王王暉以族子縛入質冬十月命伊囉斡齊主管漢民公事十一月丁亥大獵庚寅還至諤特古呼蘭山溫都爾哈瑪爾進酒帝歡飲極夜乃罷辛卯遲明崩于行殿在位十三年壽五十有六葬

起輦谷追諡英文皇帝廟號太宗帝有寬弘之量忠恕之心量時度力舉無過事華夏富庶羊馬成羣旅不齎糧時稱治平

壬寅年春六皇后尼瑪察氏始稱制秋七月張彙自五河口渡淮攻宋揚滁和等州

癸卯年春正月張彙分兵屯田于襄城夏五月熒惑犯房星秋后命張彙總兵戍杞

甲辰年夏五月中書令耶律楚材薨



乙巳年秋后命馬步軍都元帥察罕等率騎三萬與張  
柔掠淮西攻壽州拔之遂攻泗州盱眙及揚州宋制置  
趙葵請和乃還

### 定宗

定宗簡平皇帝諱庫裕克太宗長子母六皇后尼瑪察  
氏以丙寅年生帝太宗嘗命諸王阿齊台伐金帝以皇  
子從虜其親王而歸又從諸王巴圖西征次阿蘇境攻  
圍木柵山寨以三十餘人與戰帝及憲宗與焉太宗嘗

有旨以皇孫寶勒們為嗣太宗崩皇后臨朝會諸王百官於達蘭達巴之地遂議立帝

元年丙午春正月張柔入覲於和琳秋七月即皇帝位于昂吉蘇默托里之地帝雖御極而朝政猶出於六皇后云冬獵黃羊于野馬川權萬戶史權等耀兵淮南攻虎頭關寨拔之進圍黃州

二年丁未春張柔攻泗州夏避暑奇爾圭哈爾吉斯之地秋西巡八月命伊勒吉濟達率綽斯滿部兵征西是

月詔蒙古人戶每百以一名充巴圖爾九月取太宗宿衛之半以伊克們都爾領之冬十月括人戶

三年戊申春三月帝崩于杭錫雅爾之地在位三年壽四十有三葬起輦谷追謚簡平皇帝廟號定宗是歲大旱河水盡涸野草自焚牛馬十死八九人不聊生諸王及各部又遣使於燕京迤南諸郡徵求貨財弓矢鞍轡之物或於西域回鶻索取珠璣或於海東索取鷹鶚駙騎絡繹晝夜不絕民力益困然自壬寅以來法度不一

內外離心而太宗之政衰矣

己酉年

庚戌年定宗崩後議所立未決當是時已三歲無君其  
行事之詳簡策失書無從考也

元史卷二

元史卷二考證

二年命蘇布特援之 原文作速不台他卷又作唆布

台又作速卜帶今併改

五年諸王阿齊台 原文作按赤帶他卷又作安赤台

又作按只斛按只帶今併改

梁王從恪荆王守純 原文作荆王從恪梁王守純考

金史列傳從恪衛紹王子崔立為亂太后立為梁王

守純宣宗正大元年進封荆王史文顛倒今據改

孔子五十一世孫元楷 原文作元楷參考續通鑑綱目及邪律楚材傳並據孔氏家譜改

七年皇子庫春及呼圖克伐宋 庫春原文作曲出他卷又作濶出又作濶赤又訛作幹赤呼圖克 原文文作忽都忽他卷又作忽都虎忽都禿又作忽都今併改

九年獵于齊齊克察罕之地 原文作揭揭察哈他卷又作怯蹇义罕今併改

定宗三年或於海東取鷹鵠 原文取鷹鵠上衍樓字  
地志並無海東樓之名考續通鑑綱目有海東取鷹

鵠之文據刪

欽定四庫全書

卷二